

TE HEHEURAA API

I Neia I Te Piha Neneiraa A Te Ekalesia A Iesu Mesia I Te
Feia Mo'a No Te Mau Mahana Hopea Nei, I Papeete,
Tahiti, I Te Mau Fenua Sotaiete, I Te Mau
Ava'e Atoa.

Te hoo: E Piti Toata i te Matahiti.

Nu. 9

Setepa 1935

Mat. 29

*F faaite hua oe i te parau, ia onoono maite a, i te hora au
e i te hora au ore; e faaite hua i te hapa, e a'o atu, e faaitoito
atu, ma te faaoromai rahi, e te haapii-maite-raa'tu. II Timo-
teo 4:2.*

Ua Riro Raua ei Hoe.

E tuatiraa teie nei parau.

RIRO a'era taua na nunaa e piti ra ei hoê; te fenua i
apatoa ra, ua topahia ia i Muleka, no te mea e ua
aratai te Atua ia Muleka i reira, e te fenua i apatoerau ra,
ua topahia ia i te i'oa o Lehi, no te mea ua aratai te Atua ia
Lehi i reira. E iteahia te tahi iho â mau haapapuraa i roto
i te Omoni 1:25-22 e te Helamana 6:10 e te II Aarii 25:1-7.

E inaha, ite a'era Mosia e, ua haere maira te mau taata o Zaraheme-
la mai Ierusalema mai i te tau i hopoi-titi-hia'i Zedekia, arii no Iuda, i
Babulonia ra.

I haere maira ratou na roto i te medebara, e i arataihia hoi ratou'e te rima o te Fatu i raro i te moana rahi ra, e tae atu ai i te fenua i iteahia'i ratou e Mosia ra, e ua parahi ratou i reira mai reira mai â. E i te tau i farerei ai Mosia ia ratou ra, ua riro ia ratou ei nunaa rahi roa. Area râ, ua rahi ta ratou mau tama'i e te mârô ino ra, e ua pohe hoi ratou i te o'e i tera tau'e i tera tau; ua faahuru-ê-hia hoi to ratou reo, e aore a ratou e papaa parau i hopoihia mai; ua huna hoi ratou i Tei hamani ia ratou, e aore a'era i tia ia Mosia e i te mau taata a Mosia hoi i te haroaroa ita ratou parau. Ua faaue atura Mosia ia haapihia ratou i to'na ra reo. E oti a'e-ra ratou i te haapihia i te reo o Mosia, ua faaite maira Zarahemela i te aifau fetii o to'na mau metua mai tei haamana'ohia e ana ra, ua papaihia hoi te reira, eiaha râ i nia i teie mau api. Amui iho ra te mau tauta o Zarahemela e te mau taata a Mosia, e ua maitihia ihora Mosia ei arii no ratou. E i te pue mahana o Mosia i hopoihia mai ai te hoê ofai rahi ia'na, tei nia ihora hoi te parau i te ootiraahia; ua iriti ihora oia i te mau parau i ootihia ra na roto i te horoa e te mana o te Atua. Ua tuatapapa maira te reira i te parau no te hoê taata ra o Korianetumera, e te pau hoi o to'na ra mau taata. I iteahia Korianetumera e te mau taata o Zarahemela: e i parahi hoi oia i ô ratou i na marama e iva. Ua faaite atoa mai i te hoê maa parau rii no to'na ra mau metua. I te tau i faahuru ê ai te Fatu i te reo o te mau taata ra, i haere mai to'na na metua matamua mai te pare maira; i tae mai hoi te faahaparaa a te Fatu i nia iho ia ratou mai te au i ta'na utua parau-tia ra: e te vai noa nei â to ratou mau ivi i nia i te fenua i te pae i apatoerau ra.

E hi'opoa rii tatou i te mau opu mai te au i to ratou rahiraa ta tai tahi. E ia na reira tatou ra, e tamau ia tatou i roto i to tatou feruriiraa, te ture e te pen a to Iseraela. Taa ture ra, no te faaipoiporaa ia; te faaipoipo ra te mau taata no te mau opu i to ratou iho opu aua'e e tia'i, ia vai taa noa te mau opu, te tahi i te tahi.

E ia manuia'tu ta ratou na reira raa ua haamanu-maitehia e ratou te tuatapaparaa tupuna mai te au i te parau i faaitehia i roto i te Mataio, pene hoê, no to Iesu râ hui tupuna no roto i te opu o Iuda.

Teie te mau taata no roto mai i te opu o Manase, maori râ o Lehi, ta'na vahine o Saria, e ta raua pue tamaroa too-

maha; toopae ia tane e hoê vahine. O to te opu o Ephera-ima ra, o Isemaela ia, ta'na vahine, ta raua tau tamaroa toopiti, na vahine toopiti no taua na tamaroa a Isemaela ra, e na tamahine toopae a raua ra,—tootoru ia tane e toovau vahine.

Atira noa'tu ia, te vai nei toovau tane e toovau vahine. Ua oti hoi ratou i te faaipoipohia mai te au i te tia, ia faataata'tu i te fenua i hau a'e i te mau fenua atoa i te maitai, oia hoi, te fenua o Iosepha.

Te parau i faaitehia no Muleka ma, te pŭpŭ taata no roto mai i te ati Iuda, e mea iti roa ia. No reira, e ore e nehenehe ai ia tatou ia faataa i te mau taata toto ati Iuda tei amuihia i rotopu i te huaai a Iosepha; area râ e mea rahi roa ia, e tei roto i te Mosia, pene 25, te faaiteraahia.

E teie nei, ua iti te mau tamarii a Nephi, oia hoi te huaai o Nephi ra, i te mau taata o Zarahemela ra, oia hoi te huaai o Muleka, e tei pee mai hoi ia'na i roto i te medeebara ra. E ua iti hoi te mau taata o Nephi e te mau taata o Zarahemela atoa i te ati Lamana: e aore hoi ratou e tae i te afa ia tai'ohia. Mosia 25:2,3.

Ua ite papu ra tatou e, e ati rahi roa to te mau opu ta tai tahi, o tei faauehia mai e te Atua, mai te horoa i te tupuraa e te faaau i te ora e te pohe, mai te au i to'na hinaaro. E e ore Oia i faatia ia morohi te hoê a'e iota, e a ore ra, te hoê vahi iti a'e no ta'na parau; e aita atoa ia Oia e faatia ia ho'i mai ia'na ma te faatupu ore hia; E faatupu râ ta'na parau i te ohipa i haponohia'i e tia'i.

No te mea e, o Muleka, no te utuafare arii ati Iuda oia, e riro paha ia hoê â ia toto to te feia i haere mai na muri a'e ia'na i Amerika. E iti râ te parau i faaroohia no ratou, no te faatia-ore-hia te parau no taua pŭpŭ taata ra i roto i te Buka a Moromona. Ua mana'ohia ra, e te vetahi mau taata haapii Bibilia e, ua faahitihia te haere-ê-raa'tu o Muleka ma, mai Ierusalem atu, i te fenua ra i Amerika, i roto i te faaite atea raa a Ezekiel.

E titiri au i tau upe'a i nia ia'na, e fifi oia i roto tau marei, e na'u oia e aratai i Babulonia, e ei reira vau e parau atu ai ia'na i ta'na hara i rave ia'u nei. E te feia amaha atoa no'na ra, e te mau pūpū atoa no'na ra, e hi'a ana'e ia i te o'e: e te feia i toe ra, e haapurarahia ia i na mata'i atoa e maha ra; e ite hoi outou e, o vau teie o Iehova e parau nei. Te na ô maira te Fatu ra o Iehova; E rave atoa vau i tei nia i te amaa teitei i te arezi teitei ra, a tanu ai; e tope hoi au i te auru o te raau rii apî i te hoê mea iti apî ra, e na'u e tanu i nia i te mou'a teitei e te teniteni ra. Eze-kiela 17:20-22.

No te mea e, no Zedekia te mau faahaparaa ta Ezekielia i faaite i roto i te buka a Ezekielia, i te pene ahuru ma piti e te tahi â mau pene i mua a'era, e riro ia e ua tano teie nei tatararaa; noa'tura ia e e nehenehe noa i te mau taata tai'o Bibilia ia hi'opoa i te reira parau ma te aaui marû e te inoino ore.

O te tai'o ra, e haroaroa ia oia.

E taa noa ia tatou e, e mea ûrû papuhia te patereareha ra o Iakoba e o Mose hoi, i te Varna a te Atua, a faaite atea'tu ai raua i te mau haamaitairaa e tae mai i nia ia Epheraima raua o Manase, i te fenua o Iosepha. E ua hi'o atu hoi taua na peropheta toopiti ra i te tufaa fenua Amerika i te rioraa ei nohoraa no to Iosepha ra huaai.

Ua tai'o tatou i roto i te Genese i ta to Iosepha metua faanamuaraa ia Epheraima ia Manase, —te teina tei faanamuahia i te matahiapo. Te faaite atura hoi Iakobo e, e riro to raua huaai ei nunaa rarahi no te fenua nei. E tai'o tatou i te Genese i te pene 49:22-26. Te na ô maira taua parau ra e:

O Iosepha ra, e ohi hotu ia, e ohi hotu i te pu o te pape ra; o tei toro to'na amaa na nia iho i te aua ra; rahi noâ to'na mauui i te feia te'a, o tei te'a mai ia'na, e te tairoiro hoi ia'na; te vai tia ra ta'na fana te etaeta te etaeta, e te puai ra tana rima i te mana o te Atua mana o Iakoka ra, no reira mai te tia mamoe ra, te to'a pu o Iseraela ra; no te Atua o to metua tane ra, o te Atua e tauturu mai ia oe ra, no te Manahope ra, o tei haamaitai mai ia oe ra, i te mau maitai o te ra'i i nia ra, e te mau maitai o te

moana e vai noa i raro nei, te mau maitai o te û e to te opu: te mau maitai o to metua tane e hau ia i te mau maitai o tau mau tupuna ra, e tae roa'tu i te otia o te mau aivi vairaa mure ore ra, ia vai hua na i nia iho i te upoo o Iosepha, e i nia iho i te tupuai o tei tae ê i rotopu i to'na ra mau tuaana! Genese 49:22-26.

Ua faatupuhia teie atoa mau tohuraa na roto i te mau opu Inidia e to ratou ra hui tupuna, o tei parahi i te fenua e vai ra te mau mou'a tahito e te mau aivi vai noa. Ua taea roa hoi na hopea o te fenua ra, e fenua faaauhia ia no te mau mea faufaa rahi no te ao nei.

Te tupuraa o te vetahi mau tohuraa, e mea na roto ia i te papaa parau tei parauhia te 'Buka a Moromona'.

Te Buka a Moromona, o te raau ia a Iosepha i roto i te rima o Epheraima e to'na mau hoa,— te mau opu o Iseraela o te faaopehia mai, i nia i te fenua Amerika, mai te mau hopea o te ao nei. Ezekiela 37:15-19.

Te taatiraa i teie nei haapapuraa, o te heheuraa ia, na roto ia Iosepea Semita (no te huaai ia a Epheraima). Te haapii maira taua parau ra e, o te rahiraa o te mau feia matamua tei farii i te Evanelia e te Autahu'araa, i te tau hopea nei, o te mau melo ia no taua utuafare o Epheraima ra, i haapurarahia i roto i te mau nunaa. Ua horomiihia Iseraela: e riro ratou i roto i te mau fenua nei mai te farii aore roa i aubia'tu. Hosea 8:8. E no reira, tei roto ia te raau a Iosepha, oia hoi te Buka a Moromona, i to ratou ra rima e te taatihia nei ia i te raau o Iuda, oia hoi te Bibilia. E ua riro hoi na parau tuatapapa ei hoê, i teie nei, no te haaputuputuraa i to Iseraela, e te faatupuraa hoi i te ohipa rarahi i te tau hopea nei i na reira hia'i. Te fatata mai nei hoi te tau e faaho'i tiamâhia'i o Epheraima raua o Iuda, e e pinai ia te mau mou'a o Iseraela i te arueraa'tu i te Atua no Aberahama, no Isaaka e no Iakoba, e i Ia'na te hanahana e a muri noa'tu.

Papahia e Le Roy Mallery

FAARUE ANEI.

TE na ô maira o Paulo i roto i ta'na Episetole i te mau Hebera ra: *Hoê â hoi o Iesu Mesia huru i nanahi, i teie nei mahana, e a muri nou'tu. Hebera 13:8.* No reira ra e ite ia tatou e, *Aita a te Fatu ra a Iehova e peu i rave, matorî râ ia faaite ta'na parau i moe i tana ra mau tavini i te mau peropheta. Amosa 3:7.*

Oia mau taua na parau ra, i te mea e, te haere noa mai nei te heheuraa no ô mai i te Atua ra i teie nei â mahana; ia faaea ra te parau no ô mai i te Atua ra, e taiata te taata. *I te vahi aita e heheuraa, e pohe te taata; area o tei haapao i ture ra, e oaoa ia oia. Maseli 29:18.*

Te na ô maira te tahi mau haapiiraa e, ua faaorehia te heheuraa i te taata nei, i te tau no te Mesia ra, e e mea ravai roa hoi te parau tei heheuhia mai, no ô mai i te Atua ra, i taua tau ra, no te haafariiraa i te ora ia tatou nei. Teie te tahi mau parau tauturu, na ratou ra, tei papaihia i roto i te Apokalupo. *Te faaite papu nei hoi au i te taata utou e ite i te parau tohu i roto i teie nei buka, ia taati noa mai te tahi taata i te tahi parau e i teie nei mau parau, na te Atua e taati mai ia'na i te mau pohe i papaihia i roto i teie nei buka. E ia iriti noa'tu te hoê taata i te hoê i te mau parau tohu i roto i teie nei buka, na te Atua e iriti e atu i ta'na tufaa i roto i te buka ora, e i roto i te oire mo'a ra, e i tei papaihia i roto i teie nei buka. Apokalupo 22:18,19.* Te na ô maira ratou e, no te Bibilia taatoa taua na irava ra. Nahea, e farii anei tatou i ta ratou tatararaa? E e faarue-ê-atu i te mau parau i heheuhia mai i muri iho i taua na parau ra? Mai te mea e mea tia ia farii mai i te reira, a hi'o â tatou i roto i te II Timoteo. *E mai te tamrii-rii-raa mai â to oe ite i te parau mo'a i papaihia ra, o te parau ia e paari ai oe e tae noa'tu i te ora*

i te faaroo i te Mesia ra ia Iesu. 2 Timoteo 3:15.

Mai te mea e mea ravai te parau no ô mai i te Atua, i taua ihora taime, ia farii te taata i te ora, eaha ia te tumu i papaihia'i te toea o te Bibilia, oia hoi te toeraa o te mau parau i roto i te mau Timoteo ra, e te mau buka ra te Tito, Philemona, Hebera, Iakoba, Petero, Ioane, Iuda e te Apokalupo?

A hi'o faahou tatou i roto i te Deuteronomi. *Eiaha outou e taati noa mai i te tahi vahi ê atu i teie nei parau ta'u e parau atu ia outou, eiaha hoi outou e haamairi i te tahi vahi i tana parau nei; ia haapao hoi outou i te parau a to outou Atua ra a Iehova, ta'u e parau atu ia outou nei. Deuteronomi 4:2.* Hoê â hoi auaa to teie nei parau i to te parau a Ioane i roto i te Apokalupo, no reira, eita e nehenehe ia tatou ia farii i ta ratou tatararaa no te mea e, e ere i te mea tia ia faarue-ê-atu i te mau parau ra tei papaihia i muri iho i te Deuteronomi, no te mea e mea faufaa roa taua mau parau ra na te taata nei. Eita e nehenehe ia parau e, ua faaorehia te heheuraa i teie nei tau; mai te mea e nehenehe ia faarue-ê-atu te heheuraa i teie nei tau, e nehenehe atoa ia ia faarue-ê-atu i te mau heheuraa e te mau parau, no ô mai i te Atua, tei papaihia i muri iho i te Deuteronomi.

E mea au anei na te Atua ia amuihia te tahi mau parau i ta'na iho parau? E mea au roa ia, e te na reira noa mai nei te Atua i teie nei â tau, na roto i ta'na mau tavini i te mau peropheta. Teie â te tahi mau faaiteraa papu e, te haere noa mai nei te parau no ô mai i te Atua ra, oia hoi te Buka a Moromona, te Buka Fafau e te Buka Poe Tao'a Rahi.

A vai ai o Iesu Mesia i nia i te satauro, ua parau maira oia e *Ua oti*. Na ô maira te tahi mau taata e, ua oti te heheuraa no ô mai i te Atua ra; area ra ua rahi roa te mau parau i heheuhia mai i muri iho i te reira, oia hoi, te mau parau a te mau Aposetolo e te Apokalupo, e te tahi atu â mau

parau no teie nei. Na muri a'e i To'na tia-faahou-raa mai, ua heheu oia Ia'na iho i ta'na mau pīpī, *Ma te haapii atu ia ratou i te haapao i te mau mea atoa ta'u i parau atu ia outou na; e inaha, tei pihai atoa iho ia vau ia outou, e tae noa'tu i te hopea o teie nei ao. Amene. Mataio 28:20.*

Te faaea noa nei â o Iesu i pihaiiho ia tatou na roto i te Heheuraa.

Papaihia e Rui Orometua.

HE UEUERAA HUERO.

E HOA ino mae, a feruri na tatou i te parau i papaihia i roto i te Kohéleta, pene 3 e te irava 1. Tera ia te tai'oraa: *A ueue na i ta oe sitona i nia i te pape, e rave rahi a'era te mahana i mairi, e noaa faahou maira ia oe.*

E homa e, o vai Oe i faauehia nei; e o vai teie Pape i faarirohia ei ueueraa sitona? A pahono ana'e e, o Iesu Oe e faauehia nei, e o te roto i Galilea te pape i faarirohia ei ueueraa sitona.

Eaha tatou i pahono ai na reira? No te mea o Iesu tei faatupu i taua parau ra; a tai'o na i te Mataio, pene 13, irava 1 e tae noa'tu i te iva. I nia i taua mau irava ra te faaite ra ia e, ua haere o Iesu i te hiti o te Roto ra, e no te rahi o te taata i haaputu mai, ua haere Oia i nia i te tahi pahi, te tutau ra i te hiti o taua pape ra; e rave rahi te parau parabole Ta'na i parau mai, e ua na ô maira Oia, *Haere atura te ueue huero e ueue i te huero.* Tia maite atura i reira e, nona mau te parau i parauhia maira e, *A ueue ta oe sitona i nia i te pape.* I nia i te pape to'na parauraa mai i taua parau ra, no reira ua tia te pahonora.

E homa e, a tia e te feia ueue huero, a parau atu ta outou parau i te taria o te mau taata atoa, (eiaha e maiti), i te mau taata maitatai, i te mau taata inu ava, i te mau vahine faaturi, i te mau metua, i te mau tamarii, i te mau utua-fare faaroo, e te mau utua-fare faaroo ore, i te mau taata hoo tao'a, i te mau raatira pahi, i te mau taata mau auri e i te mau taata mana o te fenua nei.

E o te fariu mai no roto mai i teie nei rahiraa, a haamana'o e o te sitona ta outou i ueue ra na noaa faahou ia ia outou. Mai ta Iesu i ueue i nia i te pape ra, ua noaa faahou mai ia Ia'na.

PAPAIIHIA E TOAE A MAJRE

TE SABATI O TE EVHNELIAH NEI.

(E tuatiraa tei no te hoê parau i papaihia i roto i te ava'e Me 1935.)

EIAHA te mahana hitu, no te mea ua na muri te Atua i te faaite mai i te tahi â mahana. " Ahiri hoi Iesu i horoa i te faaeearaa no ratou, e ore hoi te Atua e na muri i te faaite mai i te tahi â mahana." Hebera 4:8. Te parau mai nei â te irava i raro a'e, no to Iesu faaeearaa, "O tei ô hoi i te faaeearaa o te Atua ra, ua faaea ia oia i ta'na atoa ohipa, mai te Atua hoi i faaea i ta'na ra. Hebera 4:10.

Ua parauhia teie nei mahana faaeearaa apî, ta Iesu i haapao, *te mahana o te Fatu*. " I riro vau i te Varua i te mahana o te Fatu ra, e faaroo a'era vau i te hoê reo rahi i muri a'e ia'u ra, ma te oto pu ra." Apokalupo 1:10. Ua faaite atea maira te Atua, i te vaha o Hosea peropheta, e faao-rehia te mahana sabati o te ati Iuda. Ua na ô maira hoi o Hosea: " E faaore atoa vau to'na, (to Iseraela), mau area-

rea, i to'na ra mau mahana oroa, e to'na mau marama apî, e to'na mau sabati, e to'na ra mau amuiraa rahi mo'a ra. Hosea 2:11.

E ui tatou no teihea faufaa te ture no te Sabati i papaihia i te Exodo 20:8-11 ?

Pahonoraa:

No te faufaa matamua ia, oia hoi, no na ture hoê ahuru ta te Atua i horoa mai ia Mose i te matamua. Eiaha no te Evanelia nei. Te na ô maira tei papaihia ra: “ Ua faaaui mai to tatou Atua ra o Iehova i te faufaa na tatou i Horeba. Aore Iehova i faaaui mai i taua faufaa nei i to tatou mau metua, (ia Adamu, Noa, Aberahama e Iakobo), ia tatou nei râ, tatou e ora noa nei i teie nei mahana. Deuteronomi 5:2.

Te faaite mai nei teie irava, aore te mau metua o Iseraia, (o Adamu, o Noa, o Aberahama e o Iakobo) i ite i teie nei faufaa no reira mai te Sabati; taua faufaa no reira mai te Sabati, o taua faufaa nei o na ture 10 ia. “ Ua parau maira hoi Iehova ia outou i rotopu i taua auahi ra; —e ua faaite maira oia ia outou i ta'na ra faufaa, ta'na i parau mai ia outou e rave, i na parau hoê ahuru ra; e ua papai ihora hoi oia i te reira i nia iho i na pāpā ofai e piti ra. Deuteronomi 4:12,13; 5:22; Exodo 33:27,28; Nehemia 9:13,14.

Na teie nei mau irava parau i nia nei e haamau maite i i te parau ra e, aita roa'tu te mau taata i mua'tu i te tau no Mose i ite i teie nei ture no te Sapati, aore hoi te i'oa *Sabati* i faahitihia i mua'tu i te reira tau. Eaha, aita anei Adamu ma e ta'na iho huaai i haapao i te mahana hitu ei Sabati? Aita roa. No te aha? No te mea aita te ture no te Sabati i horoahia'tu i to mua ia Mose, mai ta te mau irava i nia nei i faaite mai.

E tuatihia teie nei parau.

I
Peret
motu
ei Tit
ka, e
i taua
Taber
tauati

I
hoê o
ma Y
e 75.0

I
faatia
e te m
J. GA

I
mene
Diego
roto i

TE MAU PARAU API

Te Titi matamua i rapae i Ziona.

I te ava'e no Tiurai i mairi a'enei, ua haere o Hebra J. GANATA te Peretiteni no te Ekalesia, e o Reubena TARATI to'na tauturu hoê i te mau motu no Vaihi. Te tumu no to raua tere o te faairoraa i taua Misioni ra ei Titi; o te titi matamua hoi teie tei faatiahia i rapae i te fenua Amerika, e o te 114 ia o te mau titi no te Ekalesia. Hou a'e to raua faarueraa i taua mau fenua ra, ua haamaitai te Peretiteni i te vahi tiaraa no te hoê Tabenatura api te faatiahia i reira no te moni e 200,000 \$, e piti hanere tauatini tara moni marite.

E oroa rahi haamana'oraa.

I te 24 no Tiurai i mairi a'enei, ua faatupuhia i Roto Miti, Utaha, te hoê oroa rahi roa no te haamana'oraa i te 88 raa o te matahiti o to Birigama YOUNE e te mau feia mo'a taeraa mai i peho o te Roto Miti, e ua noaa e 75.000 taata tei mataitai i taua oroa rahi ra.

E haamana'oraa i Cumora.

I te 22 no Tiurai i mairi a'enei ua faahanahanahia te hoê menema i faatiahia i nia i te aivi ra Cumora ei haamana'ora i te melahi ra o MORONI e te mau api auro no te Buka a Moromona e na te Peretiteni ra o Hebera J. GANATA i auvaha i te pure i te iritiraahia te paruru o te menema.

Ua haere te pupu himene i San Diego.

I te 18 no Tiurai i mairi a'enei, ua faarue e 335 melo no te pūpū himene no te Ekalesia, i te oire ra o Roto Miti no te haere atu i te oire o San Diego. Ua haere ratou i reira, no te aniraa o Henere FORD, e himene i roto i te hoê taurua raa rahi tei faatupuhia i roto i taua oire ra.

PARAU FAAITE

E haamata te Taote ra o BACHELIER i te hi'opoa i te feia pohe ma'i, mai teie atu mahana e mai te hora 8 e tae noa'tu i te hora 2 e te afa, i te mau avatea atoa, i te FARE MAI i te pae i tai i te poromu no Ameri.

No te mau ma'i rû e to te mau mahana sabati, oia'toa te mau rui, aore e hora i faataahia no te reira, e farii noa te Taote i te mau taime atoa.

Te faaite atoa'tu nei te Taote api, mai te mauruuru, ua faa-nahonaho roa oia i te Fare ma'i i tahatai, e na'na iho e faatere ia papu te raveraa e ia mauruurn hoi te feia pohe ma'i.

Te hinu ate i'a.

Te faaitehia nei e te mau taote no te Cornell Institute ua tamata ratou i na matahiti e hitu, i te faainu i te hinu ate i'a i te tahi mau animala rii ei tamataraa, e i teie nei ua ite ratou ua paruparu te tino e te mafatu o te tahi mau animala e ua pohe roa vetahi. Te faaite nei ratou e, ua iteahia, e ratou, te vai ra te hoê mea ino i roto i te hinu ate i'a, noa'tu e te vaira te ora i roto i taua hinu ra, oia hoi te vitamine A e D.

No reira, te imi nei ratou i te ravea ia faataa ê atu i tau mea ino ra, ia ore te reira ia riro ei pohe no te taata atoa.

Louis Drollet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.